



Nivi Olsen
Demokratit sinnerlugit Inatsisartunut ilaasortaq
inatsisartut@inatsisartut.gl

Tarnikkut nappaatilinnut tunngatillugu periusissaq pillugu § 37 naapertorlugu apequtigineqartut akineqarnerat

Asasara Nivi Olsen

Inatsisartut suleriaasissaat malillugu apequtigisimasannut qujanaq. Kinguliini akissuteqarfigissavakka.

03-04-2020
Suliap normua 2020 - 4032
All. nr. 13122479

Postboks 1160
Oqarasuaat 34 50 00
Fax 34 55 05
3900 Nuuk
Email: pn@nanog.gl
www.naalakkersuisut.gl

Apeqqu 1: 2012-imi Naalakkersuisut "Tarnikkut nappaatilinnut sullissinnermut tunngasut pillugit sullissinnermut nassuiaat, 2010"-mi inassuteqaatit malitseqartinnissaannut killiffik aammalu 2013-2017-imi suliamik ingerlatitseqqinnissamut siunnersuutitut pilersaarut" saqqummiuppaat. Immikkoortoq 3.10-mi (Tarnikkut nappaatinut ilisimasat pillugit paasititsiniaanerit inuiaqatigiinnut nukittorsarneqarnissaanut inassuteqaatit) -imi imatut allaqqasoqarpoq:

"Peqqissutsimut Naalakkersuisoqarfik" Kalaallit Nunanni tarnikkut erloqissutillit pillugit paasissutissiinissamut attaveqaqatigiinnissamullu periusissiaq pilersaarummullu siunnersuutit" suliarisimavaat. Qanoq ajornangippallu qanga periusissiaq taanna saqqummiunneqarsimanersoq Naalakkersuisut qaammarsaavigisinnaavaat?

Akissut:

Naalakkersuisut nalunaarutigisinnaavaat periusissaq "Kalaallit Nunanni tarnikkut erloqissutillit pillugit paasissutissiinissamut attaveqaqatigiinnissamullu periusissiaq pilersaarummullu siunnersuutit" saqqummersinneqarsimangimmat.

Apeqqu 2: Akissut naamiuppat, periusissiap suli aallartinneqarsimanginneranut suna peqquataava?

Akissut:

Naalakkersuisut nalunaarutigisinnaavaat periusissaq "Kalaallit Nunanni tarnikkut erloqissutillit pillugit paasissutissiinissamut attaveqaqatigiinnissamullu periusissiaq pilersaarummullu siunnersuutit" sulinissamut atatillugu suliffiup iluani allakkatut isigineqarmat, tamannalu pissutagalugu saqqummersinneqarnani.

Apeqqu 3: Naalakkersuisut allanik periusissiamut soqutiginaatilinnik paasissutissiin-naanerlutik?

Akissut:

Tullinnguuttuni Peqqinnissaqarfimmi tarnikkut nappaatinut suliassaqarfimmi pilersaarutit suliniutissallu aallartinneqartut ilaat nassuiaaffigineqarput.

Ukiuni kingulliunerusuni Kalaallit Nunaanni tarnikkut nappaatit pillugit allaaserisanik suliartoqartarsimavoq, taakkulu ilaatigut www.peqqik.gl –imi takuneqarsinnaapput. PsykiatriFondip quppersagaasa Kalaallit Nunaannut naleqqussarnissaat sulissutigineqarpoq, matumani sammisanut annilaangasarnermut, nikallunganermut, skizofrenimut qangisanullu tunngatillugu.

Tarnikkut napparsimasunut suliassaqaarfik Peqqinnissaqarfiup unnuk kulturisiorfiup ingerlanneranut aalajangersimasumik ilaajuaannarpoq, tassanilu ilaatigut Dronning Ingridip Napparsimavissuani tarnikkut napparsimasunut immikkoortorta aamma Nuummi tarnikkut napparsimasunut immikkoortorta ammasarlutik, innuttaasut taamaalillutik taakkunani init atorpeqartut takusinnaassammassuk, apeqquteqarsinnaallutik aamma napparsimasutut qanigisaasutullu tarnikkut nappaatit paasisaqaarfiginerullugit.

Dronning Ingridip Napparsimavissuani tarnikkut napparsimasunut immikkoortorta unittoqarnerani aamma nakorsaasersuilluni katsorsaanerit ingerlanneranni innuttaasut tarnikkut nappaatillit qanigisaasullu tarneq pillugu ilinniartinneqarnerannik pingaartitsisuuvoq. Tarneq pillugu ilinniartitsisarneq katsorsaariaasiuvoq innuttaasup nammineq nappaatiminik katsorsarneqarnissamillu paasisarfiginerulersinnaasaa. Qanigisaasut aamma ilanngunneqartarput, taamaalillutik nappaatip ingerlaneranut, napparsimasumillu ajunginnerusumik ikorfartuisinnaaneq pillugu atortunik paasisimasqaarnerulernissaat anguniarlugu.

Tarnikkut napparsimasunut immikkoortorta qanigisaasut peqatigiiffiannik Sugisamik, Danmarkimi Psykiatridenimik aamma siusinnerusukkat nakorsaanerusimasumik suleqateqalernikuuvoq, matumani qanigisaasunut sammititamik tarnikkut nappaateqarneq pillugu paasissutissiisarnissaq, sulisunut pineqartunik sammisalinnut, innuttaasunut tarnikkut ajuutilinnut aamma inuiaqatigiit ataatsimut isigalugit paasissutissiisarnissat eqqarsaatigalugit. Pilersaarutaasup piviusunngortinniarnernut aningaasaliisussanik nassaarniarneq sulissutigineqarpoq.

Tamatuma saniatigut paasissutissiisutigineqassaaq Naalakkersuisut tarnikkut napparsimasunut suliassaqaarfiup iluani ataatsimut isiginninnerullu sullissinissaq qitiutim-massuk, soorlu tarnimikkut napparsimasunut tunngatillugu kommuninik suleqate-qarnerup sunniuteqarnerulernissaa. Inuit peqqissuunissaannut programimi Inuuneritta III-mi saqqummersussami, tassani piffissami 2020-2030-mut inuit peqqissuunissaanut sulinissamut tunngavissat pineqarput, suliassaqaarfiit assigiinngitsut suleqatigiinnerisigut pingaarnertut suliassaasuni ilaavoq eqqarsartaatsikkut peqqissuunissaq. Eqqarsartaatsikkut peqqissuunissaq innuttaasut inuulluarnissaannut siunissamilu kinguaariinnut tullinnguuttunut sullissinermi pingaaruteqarluinnartussatut isigineqarpoq. Siusissukkat pinaveersaartitsiffiusumillu suliniuteqarnissap pisariaqassusia tassunga atatillugu pingaartorujussuuvoq.

Inussiarnersumik inuulluaqqusillunga


Martha Abelsen